

Сыктывдин районса Ыб сиктын «Вичкодор» ТОС вöлі лöсьöдöма 2017 воын. Миян котыро öтүвтчисны зиль да уджач йöз. И тайö воас нин конкурсö пырöдчöмөн районса администрациялөн отсöгөн збыльмöдiм пу тротуар вöчöм кузя проект. Мöд вонас администрациялөн ышöдöмөн жö кышöдiм челядлы ворсан площадка.

Сыктыв вож



Тані чужим да олам...

Миян асвеськöдлан котырын водзмöстчысыяс окотапырысь пырöдчöны Коми Республикаса экономика министрстволөн, а сiдзжö РФ-са президентлөн гранта конкурссьясö. 2019 воöдз асланым 6 проект серти Ыбын сувтöдiм вын-эбöс песан ывлавывса тренажеръяс, лöсьöдiм футболөн да волейболөн ворсан, спортын ордйисьöмъяс нуöдан площадкаяс. Ставыс тайö зэв колана сиктын олысьяслы, торйөн нин томуровлы.

2020 воын шуим паськöдыштны уджалан нырвизынымöс да дасьтiм «Ыб сиктса почёта йöз» да «Патриотъясöс воспитайтан «Нам не дано забыть!» клуб» проектъяс.

Кызз тыдовтчис, ми асьным чужан сиктын ог тöдöй ни почёта олысьясöс, ни война кадö тылын зильясыясöс. Гозмöдöс сöмын, гашкö. А томуров и на йылысь оз тöдны.

Та вöсна кыкнан проект сертиыс кутам туявны почёта олысьяслысь да тылын зильясыяслысь олан туйсö, а сесся йöзöдны на йылысь видеороликъяс.

Кольöм во гожöмнас лöсьöдiм Ыб сиктса почёта йöзлы сiмö стэнд. Тайö проектсö ошкисны Сыктывдин районса администрацияын. «Томуровöс патри-



отьясөн воспитайтан «Нам не дано забыть!» клуб» проектис тöдчанаджык, збыльмöднысö колö унджык сьöм да, пырöдчим президентлөн гранта конкурсö, кöни лоим вермысьяс лыдын. Проект сертиыс шуим быд тöлысь нуöдны чужан му нимöдан чукöртчылöм-ад-

зысьлöмъяс, ньöбны колана небöгъяс, водзö туявны война кадö тылын зильясыяслысь оломсö. Тайö уджас босьтчисны и Ыбса школайн велöдысьяс да велöдчысьяс. И позьö нин вöчны медводдза кывкортöдъяс. 4-öд классыс Анастасия Колегова да Игнат Мартышев босьтисны «Менам чужанiн – Сыктывдин» 17-öд районса конференцияын асланыс арлыдаяс пöвстын медводдза места. Найö тöдмöдiсны тылын уджалысь Ариана Григорьевна Муравьевалөн олан туйöн.

Ыбын зэв уна енбиа йöзыс, тшöтш и гижысьяс, кывбуралысьяс, литература туялысьяс... Ми лыддям, мый колö пидисянджык тöдмöдны нывзонмöс налөн олан туйöн да творчествоөн. Дасьтiм «О той земле, где ты родился» проект да ыстiм сiйöс президентлөн гранта конкурс вылö. Зэв нимкодö, мый и тайö уджтасыс лоис медбуръяс лыдын.

Таво томуровкöд кутам туявны Владимир Безносовых, Анатолий Микушевы, Валерий Мартыновы да Егор Колеговы творчествосö. Ыбса

гижысьяс лыдö пыртiм и нималана йöзöс, кодъяслөн дачаясыс миян сиктын. Тайö Аркадий Климов, Елена Габова да Пётр Столповский.

Аддзысьлöмъясöс кутам нуöдны сиктса библиотекаын. Медся тöдчанаөн лоö Сыктывдин районса краеведъяслөн «Творим историю вместе» слёт, кодöс котыртлам таво октябрын.

Гожöмнас библиотека дорö сувтöдам «Книжный дворик «Литераторы села Ыб» арт-объект. Сэни лöсьöдам гижысьяс йылысь стэндъяс, сцена-площадка, вевта качай, сувтöдам көрт лабичьяс, садитам дзоридзьяс. Таысь кындзи кöсьям лэдзны сиктса гижысьяс йылысь сборник да видеороликъяс.

Содтöд колö пасйыны, мый ёна отсасьöны миян асвеськöдлан котырлы сиктын олысьяс, районса библиотекасын да музейясын зильясыяс, Ыбса администрацияөн веськöдлысьяс.

И öтүв зильмөн ставыс миян артмö. Кольöм 4 воён збыльмöдiм 8 проект. Таво пöртам оломö нöшта öтиöс.

Марина КОЛЕГОВА.



Казытышам

Олім сыкөд öти кадö

Апрель 9 лунö вода асыв дугдiс тiшкыны миян бур ёрт, Россияса народнöй мастер Валерий Лаврентьевич Тороповлөн сьöлöмыс. Оз эскысыы весиг, мый сiйö некор нин оз звöнит, оз юксыы аслас мöвпясöн, оз сыв миянкöд бишур дорын, оз шмонит.

Валерий Лаврентьевич, роч морт, радейтис Коми мунымöс, татчöс войтырöс, йöзкостса культуранымöс.

Сёйысь вöчавлiс iчöтик лэбачьясöс, и найö быттö ловзылысны да мича гөлöсөн сыввлiсны.

Мастер Торопов вöли и енбиа педагогөн. Бать-мам окотапырысь вайöдлiсны велöдчыны сы дорö ныв-писö. Öд нывзонкöд сiйö эз сöмын аслас сям-кужöм лунөн юксыы, но и бур оласногö туйдiс.

Медыджыд вöчöмторйыс сылөн – Вильгортын «Зарань» шöрин. Эска, воас кад, кор киподтуйö велöданiныс кутас новлыны Валерий Лаврентьевич Тороповлысь нимсö.

Ми пыр вöли аддзам сылысь восьсалунсö, бур сьöлöмсö, быдöнлы отсавны зильмöсö, и таён сiйö кыскис миянöс ас дорас.

1991 воын В.Л. Тороповлы сетöмаöсь ВДНХ-лысь зысы медаль, 1994 воö сiйö лоöма Коми Республикаса культураын заслуженнöй уджалысьöн, 1998-öдö – культура да велöдан юкöнын республикаса Госпремия лауреатөн. 1994 воö сылы сетöны «Россияса народнöй мастер», 2004-öдö – «Сыктывдин районса почёта гражданин» нимъяс.

Куимысь – 2008, 2009, 2021 воясö – Валерий Тороповöс шуöны республикаса медбур



мастерөн. А 2013 воö сылы сетöны «За заслуги перед Республикой Коми» пас.

Ми, сылөн ёртъяс, шудаöсь, мый мойвиис овны öти кадö да уджавны Валерий Лаврентьевич Тороповкöд.

Сергей ТАСКАЕВ.

Миян йöз

Йöзкостса шылад радейтысьлы бур козин

Коми Республикалы 100 во тырикжежö Сыктывкарын йöзöдöма Майя Бурлыкина-лысь «Колыбельная Прометею, или Новчимские Чисталёвы» небöг. Та вылö сьöмсö вичмöдöма Коми Республикаса национальнöй политика Министерствö.

Небöгас шöр геройыс – коми композитор, финн-йöгра культура туялысь, йöзкостса шылад ворсан инструментъяс чукöртис, Коми АССР-са композиторъяслөн котырон медводдза веськöдлысь Прометей Ионович Чисталёв (1921-1988).

Лыддысьысь уна вильсö тöдмалас и Прометей Ионовичлөн матыссаыс, рöдвуж да уджёртъяс йылысь. Тöдчанаöсь небöгас поэт-просветитель Иона Тимофеевич Чисталёв (Жан Морöс, Прометейлөн бать) да композитор-фолькло-

рист Павел Анисимов йылысь пасйöдъяс.

– Тайö воö, февраль 27 лунö, нимöдам Прометей Ионович Чисталёвöс, кодлөн чужöмсянь тырö 100 во. Композиторлысь шыладсö пыртöма Коми Республикаса «Асья кыа» сьылан да йöктан ансамбльлөн сiдз шусяна зарни фондö. Небöгсö гижысьыс – Майя Ивановна Бурлыкина – нималана ученöй, культурологияса доктор, профессор, Сыктывкарса канму университетын просвещение музейлы подув пуктысь. Чайта, сылөн тайö небöгыс лоö йöзкостса шылад радейтысьяслы зэв бур козинөн, – тöдчöдiс Коми Республикаын национальнöй политикаса министр Роман Носков.

«Колыбельная Прометею, или Новчимские Чисталёвы» небöгсö нимöдасны Питирим Сорокин нима Сыктывкарса госуниверситетын да Сыктывдин районса музейясын.